

YAME

Yameyo Yu Yateneke Wia Wetekane Pipia

¹ Yame nopa Akolali Ali Muno Yesu Keraisu-tanele takama yaku agome uku. Iserele yene tuku kakoa (12) yatene ali atoa padeka-kiti kini pine ta toa eka kuka mone take pote mepane-kiti kiwike i agale wini oane wetekakenepa mea epetekamene wane uku-ye.

Ke Enekakale Mekete Toatekomo

² Anu oya-lawe ele kuleme ke enekakolo meketepa nipa kolotini noatekole tetepo takoa eya wa wene taneya wedia meamene-ye.

³ Yesunole poti takoa togakete toatikile wene toa tomotoapa Akolaliyo ele kule ke enekakole witakakala tokono, ke wa wedia meamene.

⁴ Yesunole edikoa takatiki kotu kakoa toma pamene. Nitou wa one eni takatiki peku nateya deyaka katekameneya noa tagatapeamene.

Padele Toatekale Agopa Tokale Mekepa

Akolaliyo Wene Takamotono Kowitamene

⁵ Anu oya-lawe panago neke toatekale agopa tokale mekepa Akolaliyo wene takamotono, kowitamene. Ali atoa peya onekeya keda takoa mekala toko ago tokome nepa wene toamene ago kake kowitiko wa kikoa akamokome neke kowitikale-kiti yakoa tokala too. ⁶ Nitoono, yakoa too tadeko wa oneke wene mataneya meke poome

toameneya kowitamene. Poome taneya mekome kowitiko agopa nipa kusa ue-kiti pupulegeme popokakolo ete pato oto pato toa pewikou toa einago wene wili walai akeneya meko. ⁷ Dikoa kowitiko agopa Ali Munu agome onekeya pade edoa yakoa memotoa-pe. Padeya dedeyaka meamoo-li. ⁸ Wene takuta pianeya meko agome ele kule tikilepa pata pale-kama toko.

Ponopene Yene Kamo Yene Mekete Toatikimo

⁹ Ponopene ago ame wane uku ago nepa Akolaliyo ako ago tetepo takakono, ke wa wediamene.

¹⁰ Kamo ago ame wane uku ago nepa Akolaliyo keku kakoa ponopene ago tetepo takakono, ke wa wediamene. Ke tidiyo odepeta atua poko toa kamo ago neka atua poo tokolo tekene ni uku.

¹¹ Lou witia nokome eni ke lunopa lou potome totokakale tidiyo-pala okoa pitoo. Namolopa kalaneya kawake wete enipete atutapeoo. Nitiko toa kamo agome one kamo toma pokome one kamoya-pala dekamoa atua poo.

¹² Ele kuleme ke enekakoa kakaleka Yesunole takama poka agopa etene wedia meoo. One eni tokale enekomepa Ali Munagoyo i ago onekele takoa togateko ago tadeko wa kei pia mea kama pomotou. Nipa oneke wene mekakoi-kiti mea kama pomotou wa papete oa pikana toa taatekakome nitoo. ¹³ Nitoono, ele kuleme ke enekakoa kakale meketepa inapa Akolaliyo no likoa enekome toko wa wameamene. Ni edoamo. Padameka one likoa enamele toamoko. Ni pade Akolaliyo ali atoa likoa enekileka toamoko.

¹⁴ Akolaliyo pade nitamokoyake pine yene tone tepene piko wene kamokakome toto wa likoa

enekala toko. Lede pa totome poanele tomotoa ni toko. ¹⁵ Eni poane wenepa atoa one mati kakeneya meou toa tone tepene mati keneya kakeneya mekoname toko. Wa naniko atoame mati opiou toa tone weneke poanele witako. Eni poanele tubetema pome wipitikomewa pine ago wia tukakako.

¹⁶ Anu kolotini yene kipala i ukumopa wene kayapekayano, wedoa yakamene. ¹⁷ Tone epetaneya motokoya peyapa Akolaliyo-kama latia pikoa ni tone mea epetekateko pekupa oneme-kama lawetoa toko. Pa tokoya-kiti a tibuke latia kakane agoke uku. One eni pa tokoya-kiti wedome agopa takakolo pa toamokoyake one pade nitamoko. Pa tokoa-kala kawou toa one wene wia wawamokome epetaneya-kama takoa mekala toko. ¹⁸ Ni agome one weneme-kama totopa i i wa one mana kono-mikiti moa latikakilepa one nimini peku lawetekome toka. Yete pade ali atoa naniko moademeke namolo takoa totopa one mana kono-mikiti moa latikaka.

¹⁹ Nitikano, anu kolotini yene agale yakadetepa kale pimotoa meamene. Agale oa metekilepa poti wene kikututukoa amene. Tepene kotimi wene ponokalepa wete yaatapea wameamene.

²⁰ Timini luaneya kaketepa Akolaline kiyo akene wene pikole tamele toamoko.

²¹ Nitamele toamokono, kini poane wene-kitika ele kule poanele toma pokoileka wakete wamene. Nititikoapa Akolaliyo kiwi toa moateko peku kini tepene moa lukakana yakoa moamene. Oneke nate wene pianeya mea nitamene.

²² Toamadeteke paya nou toa yateketepa

kini wa oa yotokoino, wedoa yakoa tamene. ²³⁻²⁴ Panagome-kiti toamademeke one agale paya nou toa yatekilepa eya tou toa toko. Ali pade pinali one lene timini kakole wene kayapeademeke yomini pokoke eneteko pou toa toko. ²⁵ Akolaline totono kabe koukoa plane boku panagome-kiti lewea enoai toa wene kayapeameneya litia toma pokomepa etene kolotine meoo. Akolaline totono wane ukupa ali atoa kini tokoi poaneleme kiwi moa kautaloganeya mekita bulukoa toa moateko totonoke uku.

²⁶ Panagome-kiti Akolalinele takama yaku wa wene pikomeke one keke wedoa talo toamokomepa pinali one wa oa yotokako. Dikako agome Akolalinele takakilepa pata pale toko. ²⁷ Pade alime nitameneya Akolalinele takakomepa eya toko. Etene nineta tuaneyake egetiniya meki mati-kitika ke enekakolo wene keda taneya meki nepo atoa-kitika mama moa kiwi mekika ugu pome auapekala toko. Ni itono peku noa tiki-kitame tikile oneke weamuoo kekoa titi toma yako. Atai Akolaliyo dikako ago kei pikome okome i agome onekele takakilepa poane wene takoa koikatapeneya mekome kiyoke toko wa oko.

2

Ponopene Ali Atoa

Paya Tetepo Takameamene

¹ Anu oya-lawe tone Ali Muno Yesu Keraisu pa teleta tootapeane ago Akolaline peku nakene ago einagonole takama peketepa kamo yeneka

ponopene yeneka takoa enameneya midi pikoa makutukoa moamene. ²⁻³ Kiwi oboa mekitakiti kamo ago ponopene agota nikilipa edeki patu. Yonoke kamo kue wane mekoa mamina epetaneya kawa noko ago makutukakete ekete kamo koni ali i epetaneya waneke noke menamene wa iki patu. Nitiketeke padena ago pilia tadane mamina kawa noko ago-pala ekete kuka pa kaponamene wa-kiti oa anu kawane itonoke pa menamene wa-kiti iki patu. ⁴ Edikakipa nipa einagota midi plane tetepo takamekete poane wene pianeya meapa takoa enoa potokakete tiki.

⁵ Anu kolotini yene kipala i ukumo yakamene. Ete-kitame ponopeneya tetepo takoa wakene yenepa Akolaliyo kamo takou toane anukule takatiki peku lawetou wa takoa motoko. Nipa oneke wene mekoa meki-kiti one ta yameou wa wene toopikana toa taatekakome eni ponopene yene one mana kono-mikiti latikako. ⁶ Anu oya-lawe kime pade nitameneya ponopene ali atoa paya tetepo takoa wakete kamo yene kei pikala tiki. Kamo yename kipa tete mea koisoke lia aua pokala tikiyake nitiki. ⁷ Anu oya-lawe kipa Keraisuno ibini pianeyake e kamo yename one ibini paya tetepo takoa taumada tiki. Enipa nimini ukutu-pe.

⁸ Akolaline bokukepa one tobou kakoa oa metane totono dikaneya piko. *Pine yene kini wa mama motekete tiki toa yete pade ali atoa mama moma pamene wa akeneya.* Eni akene toa yakoa tootapeketepa nipa epetanele eni tekete toi. ⁹ Nitameneya kamo yeneka ponopene

yeneka midi plane tetepo takameketepa poanele eni tekete toi. Nipa one eni akene agale wene kikutukoa meketepa ae Akolaline totono tetekakene tadeku wa oi. ¹⁰ Panagome-kiti eni totono litia toma pokomeka padele nateleka katekoa toamokolopa Akolaliyopa einagome one totono peya tetekatapeane tetepo takoa meko. ¹¹ Akolaliyopa *mone padane atoa koua piameamene* wa oa *ali atoa wia tukameamene* waka oa taneya. Nitaneyano, anu oyago neme-kiti padane atoa koua piamekeka ali pade wia tukakepa nipa Akolaline totono peya neme eni tetekatapeko. ¹² Eya wa wene taneya meamene. Akolaliyo ali atoa takoa enekilepa kini tokoi poaneleme kiwi moa kautaloganeya mekoita bulukoa toa moateka totono plane toa takoa enoo. Nitoono, epenemo-kama oa epetanelekama toa tamene. ¹³ Ete ali atoa ela moamokome kini poanele tokoike nami wia kibu motokagopa Akolaliyo oneka ela moamokome kibu moo. Wa pade ete yene ela motokome kibu moamoko agomepa Akolaliyo kibu moamene piti moateko toa mena.

Yesuke Wene Tugoa Mekete

Epetanele Toatekomo

¹⁴ Anu oya-lawe kipala eya waneka uku. Panagome-kiti Yesuke wene tugoane meku wa oake epetanele toma poamokomepa pata pamo eni okome too. Yesuke edikoa paya wene tugoa mekalepa nipa Akolaliyo einago edoa toa momotoa-pe. ¹⁵ Kini oya ali atoa pade epetane mamina kawamoa noateko nee-pala piamoa

kobu taneya kakolo enekome ¹⁶ panagome-kiti okome tepe mataketikoa pamene. Tigini potu takateko mamina kawa nee noa tagoa kitipu poti pamene wa-kiti oake one eni mamina pade meamoa one noateko nee-pala lawetamoa pa oa wetekakomepa nipa pata pamo eni okome toko. ¹⁷ Nitiko toa panagome-kiti Yesuke wene tugoane meku wa oake ali atoa ela moamoa auapeamoa tokomepa nipa tukome tuane ago tetepo tokolo Yesuke wene tugakilepa pata pale toko.

¹⁸ Panagome eya wa-kiti oko. Panagome Akolalinele takakilepa pa oneke wene tugoa mekome toko, wa padekagome onekele takakilepa ali atoa mama moa auapekome toko wa-kiti oko. Nimodo okalepa eya wane ou. Neme-kiti ali atoa auapekile toamekeke pa Akolalike wene tugoa mekolepa enouno, yamea ta. No i agopa Akolalinele takako ago tadeko wa neme wene tomo-toanepa ali atoa mama moane auapekule yameou wane ou. ¹⁹ Einago-pala eya waneka ou. Akolali wa oateko agopa odene ago kakono wene tuku wa neme oko. Ae, ipono-kitameka wini okana nimini oko wa wene tiki. Eni wenepa tekete pa kolu kolu luaneya meki. ²⁰ Beita, paya wene pia oko ago ne-pala i ukumo yakamene. Panagome-kiti ete yene auapeamoa pa Akolalike wene tugoa mekomepa nipa tukome tuane ago tetepo tokolo pata pale toko wa neme wene tomo-toane tekene eya wane uku. ²¹ Akolaliyopa tone kua ago Eberame einagopa poanele toamene ago tetepo takoa wene keaneya mekilepa edekale taneya-pe. Eberameyo lodo yoademe kue moa latiane walaike mana Aisake moa pia oneke lodo

yoademe tokale taneya. Enipa nimini uku-pe. ²² Akolaliyo enile tamene wa okale Eberameyo litia tokomepa Akolalike wene tugo meateka kotu kakoa taneya. One nitane ago tadeko wa Akolaliyo Eberame einagopa poanele toamene ago tetepo takoa meaneya. ²³ Nipa one bokuke wia mekapiane toa taatekoa taneya. Enipa eya wa wia mekaneya. *Akolaliyopa Eberame poanele toamene ago tetepo takakilepa oneke wene tuganeleke taneya.* Nitaneyake Eberame ko ikilepa einagopa Akolaliyo oya patu plane ago wa ak-eneya. ²⁴ Nipa Akolaliyopa panago-kiti poanele toamene ago tetepo takakilepa pa oneke wene tugakoleke tokoya mena. Einagopa oneke wene tugo mekome one wene pikole-pala toma pokolo tokome ni toko wa wene toa wane uku.

²⁵ Pamoko atoa Reabeyo enile keneya eya taneya. Tobou ago Yosuyo ali takuta yukuka Yeriko ta katepa teia enepoe wa wetekakale pokoli one yapu noe wa Reabeyo makutukoa motaneya. Nitikome one yename einagota poi pia mea wia tukakaya tokale kini nokoina lono koekoa padeka lono wakapea poe wa wetekaneya. Einatoapa nitane atoa tadeko wa Akolaliyo poanele toamene atoa tetepo takoa meaneya. Enipa nimini uku-pe. ²⁶ Ali pade one yomini takoa pokome pootapekomepa tukome tuoo. Edikoa panago-kiti Akolalike wene tugo meake yete pade ali atoa auapeamokomepa nipa oneke wene tugakilepa pata pale toko. Nipa tuane agome keneya eni toko.

3

Kini Keke Wedoa Talo Tamene Wa

Mane Mane Oa Olaukanemo

¹ Anu oya-lawe tikisa ago meou wa togo togo wameamene. Wipitia ta pataka-pete Akolaliyo tikisa ali-kiti toto pitia yatekome tone natemo okoomo natele tokoole peya pine toa akoo tokolo ni uku. Ete yene edikoa pitia yakamoo. ² Padele padele tikilepa toto peyame lugutukoa petekakete pale tokala toko. Panagome-kiti poanemo ikileka toamokomepa nipa one mea epetekateko kotu kakoa mekome pinali one yono kawa eya wedoa talo tamele toko. ³ Osi kai tone wene pikoka pomotoa one kimane kene kapa tigrini deya tanikakoa eniya po kakoa lauaneya talike mea poko. Dedeyameke yeka pome yukuka pome tomotoa eni po ete oto li li toa mea poko. ⁴ Ue dipi-kiti tube mati pikoyake pupulege-pala uu okoa kako matiyame popokoa aua poademe tokaleka yopikagome one wene litia pomotoa yomo tigrini wane dedeya ue dipi tene lono uele tukaketikaneya kakome ete peke oto peke tokome aua poko. ⁵ Nitiko toa tone kekepa nateya deyameke ele kule tubele mati toane kamotokaku wa mate agale okala toko.

Yakoe, toe kagalia dedeyameke kau taneya pakeke pome pitakomepa itipono oa yomo kakoya eya odepeta napetapeko. ⁶ Kekemeka toeme eni toko toa poto tanele kamotoka kamotoka toko. Tone yono kawata tigrini wago eya pake kako ago tone keke oneke padele padele poanele tagome tigrini eya peyake weamutukakome toa

potokakala toko. Tobou iponame one poane peku lawetekolo panago-kiti noa toma pokopa nipa toe witakome eya kuya peya noawineya pou toa kekemepa pinali one wa toa potokama poko.

⁷ Yoko tue ini kaya mou eya kuya peyapa alime oiake moa kawikamele tokolo padeka-kiti takoa moapa kini agale yakoa tomotoa egetekala tiki. ⁸ Nitikiyake odene agoka pinali one keke wa kawikamele toamoko. Kekemepa eteleka otoleka koiga koiga tokome kayame ali tania tukou toa enile toko. ⁹ Tone kekemepa padepete Ali Muno Atai Akolali kei pia wa padepete panago-pala poanemo oa toko. Akolaliyo one keneya kamotoa latiane ago-pala poanemo eni oko. ¹⁰ Tone kekemepa kei pikomoka poanemoka okala toko. Anu oya-lawe totome edikoa meameamedeko. ¹¹ Ue lene togilepa meke tane ue-pala poane ueta edoa odeneka lene toa yomotoa-pe. Nitamele toamoo-li. ¹² Yomo pikikepa yomo olipe ku oyake tuamele toko-pe. Nitamele toamoo-li. Gerepi po ludukepa yomo piki ku oyake tuamele toko-pe. E'e mena. Edikoapa poane ue wa meke tane ue latia yoamoo.

Akolaline Peku Noa Toatekomo

¹³ Anu oya-lawe kiwi pakeke wene muno meane ali-kitika pademo pademo wene toa iki ali-kitika meketepa nipa ete-kitame eeno, kipa dikane alikiti tadeko wa wene tomotono, mea epetekamene. Nipa wene muno meane yene meatiki toa nate wene pianeya mekete padele padele epetanele toma yamene. ¹⁴ Nitameneya ete yene-pala kotimi yoa wene poaneya mekete ako ago kawou wa ete oto pilinali yoma yaketepa kini wa kei

piameamene. Akolaline nimini peku edikoa moa agopa takatapeoino, nitameamene. ¹⁵ Dikane ago one nako pekupa Akolaliyo lawetane peku mena. Eni pekupa kini kaua-mikitame lawetane peku. Epetane Yominine weneke titianeya mena. Tobou iponame titia lawetekoya. ¹⁶ Ete oto wa wene poaneya mekete ako ago kawou wa wili toma peketepa nipa wene wili walai akeneya mekete ele kule poanele-kama toawineya pekete toi. ¹⁷ Akolaline peku nako agome nitameneya eya toko. Titikomempa poane wene takoa koikaneya meko. Nitoa mekome poi teiane yene odene wene pikoa ni poti ko akene wene pia ni ete yename kowitikoile yakoa toa ni eko ali atoa ela moa tagatapea ni ele kule epetanele toa ni ponopene yeneka kamo yeneka takoa enamokome ali atoa peya midi plane tetepo takoa ni odene wene-kama pia meko. ¹⁸ Poi wia pitikatiki peku laweteki yenamepa nipa nee lene ipele wedoa witou toa ali atoane tepene wene kiyo akenele-kama witakakala tiki.

4

Itonoleke-kama Wene Piitikaneya Meketepa

Akolali-pala Poi Teia Mekomo

¹ Kako poi toa wa kini kini pili pili toa mokota ikilepa edoa titia witakala tokoto-pe. Ele kule poanele toada wa ete oto wa koiga koiga tikilepa tepene eida-kama titia toko. ² Panagoneya moadiya wa wene piapa moadete wili tokoa kawa teko tokolo pinago wia tukakete moato wa wene pianeya meki. Eya kuya mou wa

moamele toamokolo kako poi toa mokota okala toa kaki. Nipa eniya-kiti moameneya pa mekilepa Akolali neme mano wa kowitamekete tekete pa meki. ³ Wa pade-pete Akolali kowitiketeke padeya dedeyaka moamele toamokolo pa mekilepa nipa Akolaline wene piko toa litia toamekete tekete pa meki. Nipa kinikile wedia tato wa paya wene pia kowitikete tekete ni moameneya pa meki. ⁴ Beita, kipa pamoko keneya mekete eya wapa wene toamiki-pe. Pa itonole toma yaki yene-pala-kama oya patu pia meketepa nipa Akolali-pala poi teia mekete tiki. Itono peku naki-kiti-pala oya patu piou wa wene piko agopa Akolali-pala poi teiane ago eni. ⁵ Kime nitikala teketepa nipa Akolaline bokuke eya wa wia mekanemopa pamo akeneya wa wene pia tiki patu. *Akolaliyo to-toke moa wetekane Yomini einagomepa one odene kiwike awiane meou wa toto kōla ua meko wa wia mekaneya piko.* ⁶ Totome toa potokakoloka Akolaliyo akole tokome pewe wedoa wima poko. Nikepa Akolaline bokuke eya wa wia mekaneya piko.

Anume tukule kimeka toati wa mate agale iki yenepa Akolaliyo ete pedekama pokomeke nate wene pianeya meki yenepa pewe-kama wia kako wa wia mekaneya piko.

⁷ Nitikono, Akolalike-kama nate wene pia lukoa meamene. Tobou ipono Setanupa ete pedekakolipa nipa kiwi wete tewitikoa pitoa poo. ⁸ Akolalike note tegetekoa mekolipa nipa Akolali kiwike nome tegetekoa meoo. Ae, poanele toma yaki-kitame kini yonoke kakene kege ueme kōkitikou toa kini poanele tewitikoa wamene.

Wene takuta pianeya meki-kiti kini poane wene wia wamene. ⁹ Ke enekakolo tumai meou toa komo kata pitikoa meamene. Yau toa meki-kiti yau teigoa wawa komo amene. Wedianeya meki-kiti wedikile teigoa wawa wene keda taneya meamene. ¹⁰ Ali Munono lene yoto oneke nate wene pianeya mekolipa nipa kiwi kei pia ako moa kakoo.

¹¹ Anu oya-lawe kini kini ete oto wa akoo agale wameamene. Panagome-kiti one oya ago kikoo akakilepa nipa Akolaline totono dekoa kikoo akakome toko. Nitoa akakilepa eni totono litia toatekole piamene tetepo takoo mekome litia toamoko. ¹² Totome litia toateko totono yameteko agopa Akolali odene. Einagome odene ali atoa padeka-kiti toa moamele toa wa padeka-kiti wia atukamele toa tokono, einago luku kake anu oya neme eko aline tanele edoa pine toa akade-pe. Pine toa akakilepa Akolaliyo-kama toko. Padame pade mena.

Mate Agale Wameamene

¹³ Topo lene kianeya meki-kiti kime eya wakitiki iki. Pitikalime latia pitiki ta padeka pone mali odeneke eida mekene eya kuya topo toane kue moane kamo ago meouno, opi puku patu, podoliyo puku patu wa oi pedoa pikala tiki. ¹⁴ Eni oi pedoa pia ikilepa podoliyo witatekolepa agopa tokolo meketeki iki. Wedo pikomepa pa tekei pia takoo poko toa kiwika itonoke pa tekei mea tukala tikino, ¹⁵ eya wapa amediki. Akolaliyodo oyakeno enile-kiti toe wa okalepa nipa tuameneya meketepa ele kule tato wapa amediki.

¹⁶ Nitamedikiyake mate agale oa kini wa kei pia tiki. Edikakilepa poanele-kama tiki.

¹⁷ Nipa panagome-kiti one epetanele toateko wene tokomeke toamokolopa Akolaliyo einagopa poanele tane ago tetepo takoa meko.

5

Kamo Ali Atoa-pala Pubu Akenemo

¹ Kamo ali atoa kipala i pubu ukumo yakamene. Dika dika toamene tete-kama moko kawatikiyano, komo k̄ata pitikoa kamene. ² Kini kamoya lomutapeneya pia kini mamina-pala tiome teia tadekatapeneya pia ³ ni kini golo kue leneka silepa kue leneka lame yotokatapeneya pia toko. Eni kuepa tatiamao kamu tokoa mekoli tokome ni lame yotokatapeneya tadeko wa peyame enekete oi. Eni lamepa pine yene kiwike weamutukome toeme keneya noa teikolokoo. Kinikiya toeme napetapeateko tigotoma nokoyake kamo toma piki. ⁴ Kini ipe pupu takaki yene yotokakete eni pupu takakoinake nami wia kue meamikili tekete kini kueleke komo oa mekino, yakoe. Kini ipe kakoya nee motokane yename komo oa kakimo eya ago edelo ali-kiti lukoa meki ago Ali Munoyo yakakoa meko. ⁵ Kamo ali atoa itonoke meketepa kini wene witika toa epetaneya-kama takoa moa obokete wedia meki. Nipa oinoke wiatiki kai paya nou toa l̄awa kawou toa kamo yene kiwika wipitia ta patakoa kibu moateko oi paya nou toa kakete kamo toma piki. ⁶ Nitiki yenamepa nami kawamene ali atoa wia tukatekoi oi pedoa pia pa wia tukakala tokoi. Nipa kiwi ete wa

pedekamokolika odene lono pa puputua wia tukakala tokoi.

Ali Muno Wakapea Nomotoa

Poti Wene Piitikoa Nepia Meatekomo

⁷ Kamo yename nile-kala tikiyake anu oya-lawe kimepa Ali Muno wakapea nomotoa poti nepia meamene. Ipe toko agome-kiti nee lene matoa kadukatapeapa nodokoa kikutukoa kamotoa poti nepia meko. Nipa namolo takoa noka taame nee lene tumikoa wa naniko noka taame ku tumotoa poti nepia meko. ⁸ Ali Muno wakapea noateko tigotoma nokono, one nomotoa nepia mekilepa edikoa poti nepia mea togamene.

⁹ Anu oya-lawe kini kini ko oa akoo wameamene. Akolaliyo kime poanele tadiki wa kini nami witikaya tokolo ni uku. Koiso pitia yakateko ago yapu kago tuapea noademe dekama nokono, nitameamene. ¹⁰ Anu oya-lawe Ali Munono agale toawe akane ali-kitame one ibini patu kautakoa kakete tanele wene taneya meamene. Eni yename one agale akama yakete tete-pala moma neketeka onekele poti takama pote toganeyano, kimeka edikama pamene. ¹¹ Ke enekako-peteka Akolaliele takama pote togaki-kitipa Akolaliyo wedikako yene wa totome okoya. Eya ago Yobe one tanemo kime yatekoinakamo uku. Ke enekakale mekomeka ko wameneya poti meaneya. Ke enekakale memotoa wawake wipitikomepa Akolaliyo one papete wene toopikana toa taatekakome Yobe einago pewe wia kakeneya. Enipa kime wene tikimo

uku. Akolali einagome ali atoa ela moa mama moa tagatapeko.

¹² Anu oya-lawe eya tobou kakoane ukumo yakamene. Ipa nimini uku waka oa ile tou waka eketepa nipa agetai tia tibu tia itono tia enika eniya tia wa wedekoa wameamene. Padele toadetepa ee tou wa oa tamene. Toamade-tepa e'e toamou wa amene. Eni tia pia okoile toamokolipa Akolaliyo kibu moonoo, iya tia eya tia wa wameamene.

¹³ Kiwi panago ne-kiti ke enekakale mekepa nipa Akolali kowitamene. Panago ne-kiti kolotine yakepa nipa Akolali kei pia lo oa tamene.

¹⁴ Panago ne-kiti yene taneya pitikepa nipa Keraisuno ali atoa talo tiki ali-kitame neke kowitikanomotoo, agale oa wetekamene. Nitikale nekete neke kowitikakete Ali Munono ibini wedekoa olipe yomo ku ue neeke pekoa yotokakoa kowitiko toi. ¹⁵ Akolaliyo yakoa too wa kowitikakolipa nipa yatekome yene tane ago latekoo. Latekakomepa einagome poanele tokake po letu mekakana keemu toa waoo. ¹⁶ Kiwi yene taneya pitiketepa Akolaliyo latekamotoo, kini poanele tokoimo i i wa ete oto wa toaweaa oa ni kini kini ete oto kowitiko tamene. Wene kiyoo akeneya meko agome kowitikakolopa nipa one kowitikakamo taatekoo too. ¹⁷ Ilaida toto keneya alimepa ta noamomotoa wedoa kowitikale Akolaliyo yakoa taneya. Nitikalepa mali tebolo ponome wa tokeneka ko melepu (6) kakoa ponomotoa ta pitakileka toameneya. ¹⁸ Nitaneyake wa kowitikale ta loba pitakale itono patu padeya padeya eina yano kakoa wa

witatapeneya.

¹⁹ Anu oya-lawe kiwi panago Akolaline nimini ka pimotoa etepea toma pokale eina tewitiko a wakanakale litia wa tomotoa aua nokagopa eya wa wene takamene. ²⁰ Panagome poanele toma pokale one eni poane wene wia wamotoa tekepa nipa one tua atua poamomotoa neme toa moteke too. Nipa einagome ele kule toka poanele peya mati Akolaliyo moa agopa takatapemotoa teke too wa wene takamene.

**Weneya Totonu Keraisu Yesunomo
The New Testament in the Witu Language (also known
as the Wiru Language) of Papua New Guinea
Nupela Testamen long tokples Witu long Niugini**

copyright © 1990, 1992 Wycliffe Bible Translators, Inc.

Language: Witu (Wiru)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-26

PDF generated using Haiola and XeLaTeX on 11 Nov 2022 from source files dated 22 Nov 2019

160088da-6131-52e6-9b0f-c3dc6e8c6abb